



# Taliesin ac Aneirin – CA5

## Tasg 1: Arddywediad

Canu Taliesin, Canu Aneirin

### Tasg

Yn yr hen amser, cyn dyddiau prosesydd geiriau a chyfrifiadur, byddai pobl yn arddweud llythyrau wrth ysgrifennydd/ysgrifenyddes. Roedd hi'n bwysig rhoi sylw i bob manylyn, gan ddweud nid yn unig y geiriau oedd i'w cynnwys ond hefyd pob atalnod, fel bod y darn yn ymddangos yn union fel y dylai.

### Arddywediad

Dyma rai o'r cyfarwyddiadau y byddai'n rhaid eu cynnwys:



priflythyren	ABC
llythyren fach	abc
atalnod	,
atalnod llawn	.
brawddeg newydd	
agor cromfach	(
cau cromfach	)
agor dyfyniad	“
cau dyfyniad	”
colon	:
hanner colon	;
gofynnod	?
ebychnod	!
collnod	'
acen grom	^
paragraff newydd	//
cysylltnod (heiffen)	-
gwahannod	—



## Canu Taliesin

Tudalen 29

**Partner 1 i ddweud y darn hwn wrth Bartner 2, a phartner 2 i'w ysgrifennu gan ddilyn y cyfarwyddiadau'n ofalus.**

Canu mawreddog yw canu Taliesin. Cyflwyno inni ddelfryd o frenin yn ôl yr hen batrwm y mae o yn ei awdlau; cawn ganddo y rhyfelwr hael. Ond y mae grym personoliaeth Urien a'i fab, Owain, yn y cerddi hefyd. Yn wir, fe gofnodir mewn dull dramatig hyd yn oed eiriau'r ddau, yn ôl Taliesin, ar achlysur Brwydr Argoed Llwyfain. Hynny yw, fe geir cyfuniad rhyfedd o ddelfryd a phersonoliaeth yng nghanu Taliesin. Ynghyd â hyn ceir canu rhyfel cyhyrog a garw a chofnod o lys Cymreig. Drwy'r cwbl y mae amgyffrediad dramatig byw a dethol iawn. Ac yn cynnal y cyfan y mae grym soniarus y gerdd. Bardd y brenin mewn gwirionedd yw Taliesin.

## Canu Aneirin

Tudalen 41

**Partner 2 i ddweud y darn hwn Bartner 1, a phartner 1 i'w ysgrifennu gan ddilyn y cyfarwyddiadau'n ofalus.**

Nid bardd y brenin a gyfansoddodd gynnwys Llyfr Aneirin (neu'r rhan fwyaf o'i gynnwys gan fod yn 'Llyfr' Aneirin, fel yn Llyfr Taliesin, bethau a dadogwyd arno ef). Dyma'r gwahaniaeth amlycaf rhwng Aneirin a Thaliesin. Bardd y teulu, llu tŷ y brenin, yw Aneirin. Teulu Mynyddog Mwynfawr oedd hwnnw, ac fel hyn y bu hi. Bernir fod lle o'r enw Catraeth yn perthyn i'r Brythoniaid yn amser Taliesin [...] ond fod y lle wedyn, erbyn amser Aneirin, wedi'i gollu. Dyw hyn ddim yn brawf terfynol o flaenoriaeth amseryddol Taliesin, wrth reswm, gan y gallai Catraeth fod wedi newid dwylo fwy nag unwaith. Ta waeth am hynny, fe dybir fod Taliesin yn rhagflaenu Aneirin.

**Cywirwch waith eich gilydd.**

Pa mor glir oedd eich cyfarwyddiadau chi?

Pa mor astud oeddech chi'n gwrandao ar gyfarwyddiadau eich gilydd?

# Taliesin ac Aneirin – CA5

## Tasg 2: Darllen

Mae Gwyn Thomas wedi llunio cyfaddasiad o Chwedl Taliesin sydd wedi ei ddarlunio gan Margaret Jones:

Thomas, G. (cyfaddasydd), Jones, M. (darlunydd) (1992) *Chwedl Taliesin*, Gwasg Prifysgol Cymru: Caerdydd

Yng nghyfaddasiad Gwyn Thomas rhennir y chwedl fel hyn:

Hanes Pair Ceridwen

Dod o hyd i Daliesin

Helyntion Elffin

Taliesin yn helpu Ellyw

Taliesin a Beirdd Maelgwn

Y Ras Geffylau

Diwedd y Chwedl

Mae'r stori'n llawn hud a lledrith ac yn werth ei darllen yn llawn.



Dyma grynodeb o'r chwedl fel mae'n ymddangos ar wefan Wikipedia

[https://cy.wikipedia.org/wiki/Hanes\\_Taliesin](https://cy.wikipedia.org/wiki/Hanes_Taliesin)

Yn ôl y chwedl, roedd gan [Ceridwen](#) a'i gŵr Tegid Foel ddau blentyn. Roedd y ferch, [Creirwy](#), yn arbennig o hardd, ond roedd y mab, Morfran ap Tegid, yn eithriadol o hyll. Gan ei fod mor hyll, penderfynodd Ceridwen y byddai'n rhoi "awen a gwybodaeth" iddo i wneud iawn am hynny. Bu'n berwi pair gydag amrywiaeth o lysiau am flwyddyn a diwrnod, gyda'r bwriad fod Morfan yn ei yfed ac yn cael yr awen. Roedd hen ŵr dall o'r enw Morda yn cadw'r tân dan y pair, a Gwion Bach yn gofalu am y pair.

Pan oedd y gymysgedd bron yn barod, tasgodd tri dafn o'r pair ar law Gwion Bach, a chan eu bod mor boeth, fe'i rhoes yn ei geg. Sylweddolodd Ceridwen ar unwaith ei fod ef wedi ei gynysgaeddu a'r awen yn lle ei mab, a dechreuodd ei ymlid. Newidiodd Gwion Bach ei ffurf yn [ysgyfarnog](#), ond newidiodd Ceridwen ei hun yn [filiast](#) i'w ymlid. Yna trodd Gwion yn bysgodyn, a Ceridwen yn ddyfrgi. Trodd Gwion ei hun yn aderyn, a throdd Ceridwen yn walch i'w ymlid; yna pan oedd y gwalch bron a'i ddal, gwelodd Gwion bentwr o wenith. Trodd ei hun yn ronyn gwenith ynghanol y pentwr, ond trodd Ceridwen ei hun yn iar a'i fwyta.

Wedi bwyta Gwion beichiogodd Ceridwen, a naw mis yn ddiweddarach ganwyd plentyn iddi. Gwyddai Ceridwen mai Gwion Bach oedd y plentyn, ond roedd mor dlws fel na allai ei ladd. Gosododd ef mewn cwdyn o groen a'i daflu i'r môr.

Roedd gored bysgod yn eiddo i [Gwyddno Garanhir](#) ar y traeth rhwng [Afon Dyfi](#) ac [Aberystwyth](#), a cheid gwerth can punt o bysgod yn y gored yma bob Calan Mai. Roedd un o feibion Gwyddno, [Elffin](#), yn nodedig am ei anlwc, felly rhoes Gwyddno yr hawl iddo i dynny'r gored ar Galan Mai y flwyddyn honno, yn y gobaith y byddai ei ffawd yn newid. Pan aeth Elffin i dynnu'r gored, nid oedd dim ynnddi ond y cwdyn lledr yn cynnwys y baban. Cododd Elffin y baban a dywedodd wrth ei was "Llyma dal iesin" ('Dyma dalcen teg'): "Taliesin bid!" atebodd y baban.<sup>[1]</sup> Canodd y baban gerdd iddo, 'Dihuddiant Elffin,' a oedd ymhlith y cerddi mwyaf adnabyddus yn yr Oesoedd Canol Diweddar. Mae'n dechrau gyda'r pennill

'Elffin teg, taw a'th wylo;  
Ni wna lles drwg obeithio;  
Ni chad yng ngored Wyddno  
Erioed gystal â henno.'

Aeth Elffin ag ef adref i'w fagu gan ei wraig. Yn ddiweddarach mae Elffin yn mynd a Thaliesin i lys [Maelgwn Gwynedd](#) yn [Neganwy](#), lle mae'n ennill gornest yn erbyn beirdd Maelgwn ac yn achub Elffin o garchar.



Dyma sut mae Gwyn Thomas yn cloi ei gyfaddasiad yntau:

### Diwedd y Chwedl (Tudalen 61)

Ar ôl i Faelgwn Gwynedd ddod dros ei siom o gollî'r ras, a chydabod fod yna bobl cystal ag yntau yn y byd yma a phethau cystal â'i bethau yntau, a bod Taliesin yn wir yn Ben Beirdd ac yn Brif Fardd y Byd, daeth o ac Elffin yn gyfeillion mawr, yn fwy o gyfeillion nag oedden nhw cyn iddyn nhw ffraeo. A byddai Elffin ac Ellyw a Thaliesin yn ymweld yn aml â llys Maelgwn yn Negannwy. Yno, o bryd i'w gilydd, byddai Taliesin yn proffwydo ac yn dweud wrth Faelgwn beth a fyddai'n digwydd yn y dyfodol. Un o'i broffwydoliaethau enwocaf un oedd proffwydoliaeth am genedl y Brythoniaid neu'r Cymry.

Eu Nêr a folant

Eu hiaith a gadwant,

A'u tir a gollant

Ond gwyllt Walia.

Yna caiff Brython

Eu tir a'u coron,

A'r bobl oedd estron

A ddiflanna.

Roedd proffwydoliaethau Taliesin weithiau'n anodd iawn eu deall. Ond dweud y mae'r geiriau hyn, os bydd i Gymry addoli Duw y byddant yn cadw eu hiaith ac yn cadw eu tir.



Ymhen hir a hwyr bu farw Elffin, bu farw Ellyw, bu farw Maelgwn Gwynedd, ac aeth Taliesin o'r byd. Ond y mae rhai'n meddwl mai newid ei siâp a wnaeth o – fel yr oedd o wedi gwneud er adeg Adda ac Efa – a'i fod o, efallai, yma o hyd.

**Tasg**

Mae nifer o gerddi byrion wedi eu cynnwys yng nghyfaddasiad Gwyn Thomas o *Chwedl Taliesin*.

Dewiswch unrhyw un o'r isod a dysgwch hi ar eich cof.

Rhowch hanner munud i bob llinell ac un funud i adolygu'r cyfan.

Adroddwch y geiriau wrth eich partner.

Yna, yn ystod y wers nesaf – profwch eich gilydd i weld pwy sy'n gallu cofio orau.

Pe byddai'r traddodiad barddol yn dibynnu ar eich cof chi, sut siâp fyddai ar bethau, tybed?!



Abracadabra Abracadû Rydw i yn awr am dyfu plu A bod yn glamp o iâr fawr ddu. (t. 20)	Dychmyga di pwy yw Un sy'n bod cyn y dilyw Heb 'run wythïen, heb waed, Heb ben a heb draed. (t. 48)	Elffin deg, paid di ag wylo, Paid ti byth â meiddio 'meio Am mai fi oedd yna yno Y bore hwn yng Nghored Gwyddno. (t. 26)	Eu Nêr a folant Eu hiaith a gadwant, A'u tir a gollant Ond gwyllt Walia. (t. 61)
---	---	--	--



## Taliesin ac Aneirin – CA5

### Tasg 3: Ysgrifennu creadigol

Rydych chi wedi cael swydd fel gohebydd rhyfel i bapur newydd safonol.

Yn seiliedig ar y wybodaeth sydd yn y cerddi uchod, lluniwch adroddiad byr a fydd yn ymddangos yn y papur newydd y bore wedi'r digwyddiadau.

Does dim llawer o le yn y papur newydd, ac mae'n rhaid i'r adroddiad fod yn 300 gair yn union.